

华阴县续志

一
函
六
册

華陰縣續志卷六

列女志

女秉坤性至柔而剛唯柔斯靜唯剛斯方詩美共姜傳褒伯姬靡他永守從
一不移失節事大餓死事小綺歲霜零素心月皎懿著元閨馨書彤管傳列
更生揮毫繼續述列女志

目

王恭人懿行

烈女

節孝

貞烈

節婦

孝婦

賢婦

節孝仙媛

壽婦

華陰縣續志卷六

列女志

王恭人懿行

陰晉異函

李汝榛

王恭人少司馬之良之妻邑陽化村張重光女也司馬初聘其姊有美質恭人字於花氏頗著黑醜之稱花故豪富聞之斥媒使退婚重光惶懼陰與媒謀約同日于歸先以姊適花氏而嫁恭人於司馬入門詢得其奸無如何也然恭人多智識司馬敬待而篤伉儷之情焉司馬晉陞兵樞以病予告回籍調理例差武弁護歸司馬撫轅日提督軍政左良玉隸其麾下左暴橫時肆跋扈之狀司馬裁抑不少恕左銜之至是請行率健兒百名欲甘心於途恭人察其有異志防之甚周次湖廣光化縣司馬遂薨恭人慮變匿不發朝夕假司馬之命賜予慰勞愈厚以故左猶豫未決恭人潛遣捷足奔回遴家人族丁之壯勇者數百人迎衛至靈寶家丁

來恭人乃召地方文武官弁密以情告命呼兵役羅列公舍始以喪聞又具千金餽左而謝曰公已歿且抵家僅百里餘盜賊方張急待將軍殄滅無煩度關也請以此備健兒醉飽資左始悟悔恨擲金於地悲曰左良玉乃爲一老嫗所弄頓策馬簇擁而去時崇禎十五年十二月臘初事也或云左意俟至潼關之東血刃示威而以病亡具報恭人偵知故措施如算也

李汝榛曰女有四德新婦所乏者容耳何至奸生指鹿術巧易羊卒之相夫而貴八座起居且扣其囊底智足使寧南斂鐔竊恐螻首蛾眉者未易辦此

野史氏曰恭人以齊宣后無鹽之貌而有衛碩人莊姜之德具晉文公妻姜氏之智術含而不露易嫁於寒士而不怨見嫌於司馬而不悔而司馬終相敬如賓其德有過人者又能以鎮靜脫寧南之禍智深勇沉闊以外不多得也以貌取人之失司馬蓋隱推此義佩服恭人於平日矣所尤奇異者誕生

賢哲長子而時宏學三子雲隱宏嘉五子山史宏撰三先生皆關學編中鉅
子並入鄉賢次子宏期四子宏賜六子宏輝均食餼費宮學品兼優孫曾科
甲數世至今繼緒非甚盛德烏能及此昔西伯以上聖之質又得聖女妣氏
以爲配篤生武周聖子以彼方此或無多讓裴晉公自贊云爾身不長爾貌
不揚胡爲將胡爲相一點靈臺丹青莫狀合恭人身度卓識觀之轉而移贊
誰曰不可

楊氏通洛里民楊雄女年十六許字潼關觀察舍人郭恆恆客遊湖南久不歸雄
議改嫁女不可斷髮誓守家有巖壁鑿穴居之垂索以通飲食者二十六年恆歸
乃成禮攬鏡自照曰世有白髮新婦耶時已四十有二矣見舊志潼關志亦載之
李汝榛曰楊氏堅貞可風欲倩高才咏之不果偶閱李漁笠翁集記湖州府志
歸安倪氏女許聘陳敏八敏八從軍不返誤以死聞倪矢志不嫁越五十載而

敏八歸始成婚姻之禮時年六十一夫六十八霜雪盈頭顛人號白頭花燭可見天下事未有無類者笠翁以府志無詩而爲五言長韻以賦其事作白頭花燭詩殊鄙俚不稱題拈此以備他日引玉之端

松果山前香霧起
潼津流斷鳴咽水
行人夜唱大刀頭
曉入楊家石竇圯
石竇鑿空二十秋
薜蘿長鎖姝者子
鴈娘已逝胭脂消
睡損當年鸞字紙
堂上憐兒小語繁
憐兒爲兒求庶士
翻身拭淚拜蒼華
把剪剪雲雲亂委
疏戶蕭蕭煙火息
倒拖修綆汲糠粃
腰肢一掬不勝衣
黃瘦依稀中令姊
耿耿長眠知幾時
青天白日矢之死
衡陽飛鴈失歸期
湘渚波寒少素鯉
玉貌潛彫綠鬢毀
星星難遮六寸纒
此生祇解白頭吟
拋却菱花擲象齒
惆悵朱顏季隗悲
朝朝暮暮待重耳
違鄉遊子肯還鄉
紅照千行黃巷裏
塵蝕青銅閣淡光
朦朧猶得插纓珥
羞垂雪髮委墮鬢
趨向秦樓迎簫史
絳蜡高燒認阮郎
霜毛墜肩非髮彼
今夕何夕老黃姑
銀漢盈

盈看鵲喜漏永更沉短檠明拔釵挽袖剔燈蕊守宮走腕血淋漓碎點珊瑚半臂
紫細雨滴堦濕合歡輕風颭砌飄連理惜花常繫護花鈴雨打風吹今免矣爭說
新婚趁妙齡那知四十纔宴爾憑君莫怨新婚遲水媚山輝通洛里

烈女

李烈女王進喜聘妻貢生李榕姪女進喜卒女年十七聞之請於父奔喪守義終
不嫁年五十二旌表如例 見同州府志

送女奔喪吟

并序

雲岡李榕

季女元元余弟子建之女也許字王門于歸有期而夫死女聞之哀痛涕泣懇請
赴喪父母不許悲痛不食來問於余余曰此意良好來日大難歷告以守節堅苦
歲月久長倘不克終反不如從俗之無瑕也女泣曰古云烈女不更二夫此事一
死了局夫復何難所不即死者以孀姑無依欲代亡人供子職爾姑逝當即從之

余曰視死如歸貞一不二操是道也以往其無所失矣因以示弟傳告其姑姑喜而迎之于其歸也詩以送之

未整竹筥已暗傷菟絲引蔓恨偏長而今羅綺全無用縞袂榛筥與練裳
冷淡秋容九月霜哀鳴孤鴈赴瀟湘清風明月應是淚剩有琴瑟託渺茫
送兒縞素渡河橋便入空房守寂寥獨活草生心自勁奇莖端不畏風飄
還將往事想摩笄萬仞青山留品題慧劍相隨爲伴侶也教秋水耀清溪
李元姑儒家女也未嫁而夫死女矢不二謀素服奔喪奉孀姑以老姑喜而迎之
遂于歸焉吟以誌美

綵帳曾將綵線牽橋成未渡赴黃泉夫君莫恨幽明隔月缺星沉總是天
妝臺換得練衣新洒泣于歸出性眞多少路旁爭看者酸心人是未亡人
此身誓死屬王郎人鬼琴瑟托渺茫孤調彈來誰與和一輪明月一天霜

石猶可轉志難移願代亡人展孝思莫怪孀姑憂便喜得來佳婦即佳兒
阿姑拜罷泣如麻獨坐空房只自嗟紅燭不知人永訣深宵也放一枝花
爲人最苦是孀嫠一樣孀嫠此更奇翻羨新婚成永訣生前猶見婿容儀
最憐雛雁誓孤飛義士忠臣一樣稀不向望夫山上去出門只採首陽薇
貞心千古數共姜之死靡他鐵石腸說到元姑從一事柏舟守義亦尋常
見明守定女中無巾幗居然烈丈夫堪愧二臣逢鼎革圖新不顧姓名污
人生百歲總成空富貴繁華一夢中惟有節廉忠孝事芳名不墜古今同

雲圃親家大人送女奔喪吟見示賦此

封翁閩鐵省軒

一回暗想一回傷來入空房飲恨長苦緒哀情誰見得淚痕濕透素衣裳
傷懷獨自悲秋霜揮淚無緣到沅湘未識心情何日了青天碧海任茫茫
當初往送渡河橋靜守寒窗耐寂寥矢志青春期白首貞心原不逐風飄

如今事已冠簪筓多少文人費品題但得瑞筠成操後高名千古伴清溪

雲圃大伯大人送女奔喪吟

閻敬銘 丹初

哀情一去守空房幾度思量幾度傷惆悵箱奩餘縞素當年枉作嫁衣裳
孤鴻啼怨一聲聲望斷三湘縹渺情不是抗懷矜素節人生去就要分明
非關甘作未亡人一顧高堂一愴神此去聊寬慈母意含情忍把淚沾襟
如此蕭條更仗誰女兒身並作男兒那堪之子歸來日正是家貧室罄時
一片孤懷履素霜此身端不負王郎兒家自有兒家事還把心情慰阿孃
未有歸期自請期高風從此愧鬚眉要知松柏能成節都賴先生女誠垂
如今邢衛許論婚定卜深閨哲弟昆他日天章遙錫處更添聲價到龍門

述嗣母李孺人行狀

王映彬

先妣氏李潼關廳籍世居華陰縣東王村遠祖曹國公文忠明初從龍有功起家

將軍子孫襲職至

諱

希賢者爲潼關指揮使遂家焉入清太高祖夔龍以廩貢生

教諭華陰聖祖皇帝西巡以卓異特旨簡授保昌縣知縣在任有循聲從此書香

綿延父

諱

標庠生伯父

諱

榕文行兼優學者稱爲蔭伯先生母氏張亦名族先妣

姊妹二長適朝邑閭散與先生先妣居次先妣生而聰慧凝靜異常十歲解女紅日夕不輟雖未識字讀書然嫺姆訓如女誠女經一說了然若素所誦習者先祖母聞其賢遂爲先考委禽焉先妣年十七于歸有期而先考竟以疾不起訃聞於李先妣一痛幾絕涕泣數日飲食俱廢告父及伯父曰女聞烈女不更二夫非有大故不出其門今夫亡孀姑無依女願代亡人以供子職父不可先妣誓以死殉一日早起往村南將投井鄰人救之父見貞烈成性志不可奪許其行時道光十七年秋九月也奔喪臨行父與伯父各以詩章勗之無他奩贈惟佩以劍以示微意所過村堡婦女爭觀擁遏車馬不能行凡有知識者莫不感歎流涕本村趙德

章以孝廉任山西臨縣知縣罷職家居聞先妣至曰此異人也命妻子跪道旁執酒迎之邦人士亦聞而稱奇贈以詩歌文賦另有彙集邑侯姜申璠異其事申詳大憲轉上於朝旋奉諭旨褒嘉准守貞三十年後旌表如例入祀節孝祠先妣自奔喪後慎出入謹言語朝夕起居惟姑是從姑每思子哭泣至廢寢食先妣多方勸解跪依膝前哀止方起每飯必親無夕不侍先意承志曲盡婦道不孝本生祖父每見而喜之且憐而慰之道光丙午歲飢舉家乏食先妣活光度日典盡衣衿不惜也家人或勸少留之先妣曰養親爲大惜物何爲不孝本生祖謂先祖母曰有婦若此無異佳兒斯時不孝生父幼先妣以兄嫂代撫小叔顧復鞠育有加無已厥後生父常以母事之同治壬戌髮逆過境闔家避棲山谷不孝本生祖剛勇異常率衆殺賊歿於戰事生父遠遊他鄉叔父尙幼不孝亦僅在懷抱外無禦侮之親內少負薪之童仰事俯蓄艱難萬狀先妣理家務勤紡績雖菽水承歡終無

懈意里人賢之稱爲女中丈夫迨同治壬申閩迺不孝姨兄也以庶常官京師

爲先妣呈請旌表咨行到縣查明覆部先祖母亦蒙旌表俱准建坊入祠光緒戊

寅先祖母見背先妣痛欲不生曰吾事畢矣拔劍自刎者再皆爲家人苦勸而止

癸未先祖母及先妣入祀節孝祠乙丑建修節孝碑兩座里人仰高風者嘖嘖焉

不孝幼時愚不知學先妣嘗撫不孝而言曰幼不學老曷爲倘不潛心攻書非吾

兒矣稍長令就外傳凡脯修資費多出母手節敬春筵無一稍缺時有饋異味者

先妣常不忍食必令奉之先生諸子姪孫讀書無不加意甲戌不孝補儒學弟子

員弟學彬爲彬先後俱以府試第一入學人咸謂潛德日彰先妣戒諸子曰此讀

書之驗也吾願汝輩勉之先妣治家以肅率下以儉教子女有法梱以內肅如也

偶見有明璫鮮妝風言笑語者輒弗喜俛首不顧曰此非吾家風也嗚呼此我母

之有造於我家也此我母大節炳炳於天壤間也憶嫠實之歲以光緒二十三年

丁酉三月十六日戌時距生於道光元年十二月二十日戌時春秋七旬有七計
守貞六十年不孝幼爲所抱即爲之嗣娶崔氏田氏崔氏早逝孫男三長執周庠
生聘潼關廳武舉張世英女次執恭執權俱幼孫女二均未字今卜葬於村南新
塋壬山丙向謹述大畧以備采擇俾信於後謹狀

蘇氏花天顯未合卷之妻也天顯歲當舞勺母因家貧命服賈遠方以謀生計時
蘇女已許纓於花而天顯卒於外母因思兒鬱結成疾湯藥乏侍乃招女過侍操
井臼如舊婦姑疾彌留恐至不諱婉言慰解卒使沉疾漸瘳氏即戀姑不歸定省
無間及卒族衆建坊請旌以表苦節其聯云未接夫顏空鐵性嫻循女範自霜筠
王氏王三錫女也許字段士校年十三值髮逆圍村女自分不能逃與母相泣而
別誓以捐軀遂啟門往投東鄰之井瞥見男女紛雜嘆曰有別之義豈在此轉至
西鄰井畔望之皆女流遂爭先投之而死

見府志

貢氏豫省湖城人生而明慧教之讀輒能上口父沒依外祖爲生活稍長儀守內則不苟言笑女紅之外一意承歡孀母賴以少慰年十七字華陰刑部郎中李善初之子書城母之內姪也二姓雖係中表之親而書城生長燕京隨侍父任曾未一躡女門故無半面緣旣而書城以疾卒兒耗至女痛不欲生越一載母欲另字女因悲憤不言亦不食託疾謝母漸至絕粒卒以不起蓋其從容就義不顯淑烈之名早決於不言不食之時矣

彭貞女貢生彭延齡女字郝宏文夫家貧翁又歿家人欲悔親女聞之潛使人謀諸舅氏曰所不歸郝氏者神明鑒之郝氏濟則甥之福不濟當以死繼之卒適郝氏後以嗣子履謙列茂才姪履方舉鄉薦率子時往彭氏之門爲其父母奠祭焉楊烈女諸生楊朝柱女未字同治間髮逆過華刼朝柱且強女行不從將殺之朝柱曰汝速往勿念我渴則井可飲女會父意遂就道賊復索朝柱銀馬不暇顧女

適路側有井急往投焉賊追之已無及

楊烈女楊增爽女字貞發明有姿色髮逆至女聞之語人曰婦人所恃者節耳與其生以失節不若死以全貞家人驅之逃女度難自全遂潛縊於樓時年十五

田烈女田大豐女年十七值捻匪亂隨母避居原上賊突至欲脅之行且慰曰勿恐吾不傷爾女見勢急謬指同行老婦謂賊曰此媼吾母也若從汝吾即隨去賊回顧女乘間投崖死

孫烈女永濟良家女以歲饑賣爲華陰某家作婢風度端凝出門不舉首人咸異其非婢之面目光緒六年十月年十七自悲流落不偶幾遭強暴汚以嚴拒免服毒而死

陳烈女監生煥霖女

節孝